

焦太史編輯國朝獻徵錄

焦太史編輯國朝獻徵錄卷之四十六目錄

刑部三

侍郎

黎光

胡子昭

楊泰

劉季麓

樊敬

曹弘

葉春

陳鼎

丁鉉

丁鉉

張鳳

劉清

孔文英

黃仕雋

廖莊

曾羣

林鶉

張錦

魏紳

李士賓

郝志義

葉贊

魏富

張鸞

王寅

楊茂元

劉玉

王啟

劉節

朱廷聲

陳璋

蘇民

王浚

葉相

詹瀚

鄭大同

楊大章

萬虞愷

新安黃之采

全校

吳興茅元儀

錢塘徐象楨

刊行

目錄終

獻徵錄

卷之四十六目錄

二

吳山館

焦太史編輯國朝獻徵錄卷之四十六

刑部三

侍郎

刑部侍郎黎光傳

黃佐

黎光字仲輝東莞人博學能文倜儻有奇氣洪武壬子膺鄉薦釋褐拜監察御史正色立朝早有風裁嘗巡歷蘇州民罹水災缺食具實以聞得蒙賑濟存活者甚衆及巡歷鳳陽所上封事皆切時弊遂受知于上其在朝也執法不阿爲御史大夫陳寧所忌陞刑部侍郎纔三閱月陳以他事中之竟卒于謫所人皆

情之

胡公子昭忠節祠記

劉應箕

刑部左侍郎胡公以革除初灰建文難自永樂歷弘治俱以時禁未解宦遊者憚弗敢談後御史熊公相巡按四川立祠於榮縣祀之時正德八年去茲又七十年餘矣尋廟宇傾圯蜀之學士大夫談靖難革除事者俱彷彿未究其詳至于胡公事尤悄悄焉鮮有悉其顛末者萬曆甲戌監司田公分憲川東其除患剔蠹明罰勅法罔有遺力焉而敷政畢化之餘又恒以風教爲首務適部使者孫公暨郡守朱公咸與公同心銳意崇尚每諸有司來謁者輒以其邑之行誼

風俗古今人才下詢爰諏博訪恐砥名勵行者晦弗彰也不數月大足令康君果來言胡公事胡公事載在縣志者略不可詳然其出處之大節仗義之危行則固有以備其履歷者夫君臣之義綱常之懿乃生人無所解于其心者恒人或競榮而迷道或怵勢而屈身或歷難而易慮則秉懿之賦在厥心者亦將解之以康于世而罔知所以自振焉者滔滔也乃胡公當靖難渡江之際首倡大義抗節不屈彼豈樂刀鋸之慘而惡爵祿之康耶記稱其富經術性方介其再從方孝孺遊漢中蜀獻王有問學日廣道德日隆之



贈則其抱蓄于胸次者固不凡而稟賦于天與者與  
人異故當利害臨大節乃能脫然不怵于勢不競于  
榮若中流之砥柱屹然等華嶽而不可移也嗟乎傑  
哉 文皇帝爲 高帝之子建文寔 高廟之孫革  
除諸公忠建文所以忠 高帝也 文皇帝當諸公  
之歿曰彼食其祿自當盡其心耳 昭皇帝亦曰若  
方李孺輩俱忠臣也永樂中先後詔復諸公家而胡  
公與焉提挽綱常培植國家億萬載祚運於不替者  
胡公之節義其關係世道豈渺小哉田公仍飭邑令  
康君芟地鳩材於縣郡之南建祠立石而又定其常

需命有司春秋祭饗復遣裔胡興先等令之世守祠  
宇夫廟貌森嚴歲祀無數且復其家恤其後俾之世  
守堂宇于亡窮敦誼崇化之典不其偉與胡公諱子  
昭字仲常初名志高誌謂太祖改今名往來從學  
方孝孺講明理學蜀獻王重之以明經儒士薦爲榮  
縣訓導建文初陞翰林檢討進刑部左侍郎靖難師  
渡江建文四年九月歿之時年四十一父名復初母  
郭氏皆年八十餘十五人給緝繼等謫戍女金奴沒  
爲官婢弟胡子義初名志遠亦膺薦辟分教威遠後  
陞山東按察司僉事遇兄事棄官匿丹稜有懷鄉詩

載在誌牒語意悲壯蓋有得於兄之教而伯仲齊鳴者也蜀嘉定誌謂二公爲榮縣人然備考胡氏家譜及子孫作佛事錄籍并永樂赦復其家勘合俱爲重慶大足人記帖明甚而榮縣則子昭初訓導所經地也或曰志遠爲蜀府典寶或曰子昭爲史官陞兵部侍郎刑部尚書或又曰子昭無子止一女名金奴記載互異以時諱不敢彰灼其事故彼此舛誤然胡公孤忠勁節所以扶植人紀綱維世道者在天地間自耿耿不磨也其他又曷足深論耶若夫楹棧瓦石之細祠堂棟宇之度則有司存又何暇悉記載余惟服

當時同難共事一門父子兄弟之誼高御史熊公之  
令圖而又嘆今部使者採覽監司田公之表朱公之  
振振邑令康公之經度足以風世哉足以風世哉

北京刑部右侍郎楊泰

永樂十一年三月

實錄

泰淮安山陽人洪武中由國子生歷工戶二科左給事中陞戶科都事中擢北平按察司僉事永樂元年以守城功陞北京行太僕寺右少卿改通政司左通政陞侍郎六年卒

刑部侍郎劉公季麓傳

劉季麓諱韶以字行浙江餘姚人也洪武甲戌進士授行人使雲南四川朝鮮餽贐一無所受事聞賜鈔襲衣丁丑進陝西左叅政民有逋賦積歲不能輸有司峻刑督之公至慨然曰民困不能輸爲之父母忍督責之邪乃下令緩其征民皆感激假貸以輸陝不產礪砂而歲有課額爲奏罷之洪渠水溢爲民患乃設法治堰水不病民召爲刑部侍郎獄多平反尤重人命陝人王某爲強盜所引逮至而盜已伏法不能自白乃召盜之妻子使識之而聽其詞竟得實王

免於誣有典守錢穀而虧允者誣引千餘人爲辨而  
釋之河陽逆旅夜有朱趙二人異室而宿朱怨家後  
追至乃悞殺趙朱實不知也主人疑朱殺之執送官  
考掠誣服公獨疑之曰是邂逅相聚非素有負且計  
其裝非有圖也特緩其獄竟得敘趙者楊州人胡氏  
夜有賊入其室殺人而遺刀屍傍且視之刀柄有私  
識則其隣蘇氏也官捕鞠之蘇氏曰家失此刀久矣  
不服旣備極諸刑竟誣服公潛使人懷刀往視其隣  
一童子識之曰此我家物也遂得賊而釋蘇永樂乙  
酉纂修大典 命少師姚廣孝及尚書鄭賜監修而

難其副乃以 命李旆討論裁決人多服之庚寅坐  
失出人罪左遷兩淮鹽運副未行改工部營繕主事  
躬勤治職不以榮華爲意



刑部右侍郎樊公敬傳

實錄

樊敬字守一鄆城人洪武辛未進士初授左春坊司諫改行人司副擢鴻臚寺丞累至大卿永樂八年以左通政鎮守真定撫安軍民十六年車駕北征時以廣惠伯劉才總兵王友行師失律命敬馳至、斬之撫師而歸十八年復以行軍司馬鎮守濟寧撫操十萬壯士指揮等官得自除授總兵以下悉許節制違令者斬其委重如此宣德元年以刑部右侍郎清理江北軍務二年大征安南遣敬轉餉深入蠻方

撫蘇不後敬鎮濟寧時過其故里駐節城南草堂四

方學士多歌詠之

刑部右侍郎曹弘傳

曹弘字文淵湖廣長沙人永樂乙未進士授刑部主事陞員外郎宣德庚戌朝廷以東南諸處糧賦不充而民疲於趨事特命廷臣薦可當重任者往撫治之得弘等五人俱拜爲侍郎弘授勅巡撫山東淮揚等處事集而民不擾一方賴之以安正統三年十二月得疾卒于揚州年四十有八訃聞遣官諭祭命有司歸喪治葬

刑部右侍郎葉春傳

刑部右侍郎葉春浙江海鹽縣人初爲禮部主客司主事陞郎中再陞兩淮鹽運使改福建布政司右叅政宣德三年調四川未赴任奏浙江土豪爲民患郡縣不能制上命大理寺卿熊舉錦衣衛指揮任啟及春巡撫蘇常及浙西諸郡察捕強豪以安良善春雖行事於其鄉能持公道既還陞右侍郎居無幾遭疾卒時宣德八年六月計開賜祭命有司治葬

葉侍郎墓誌銘

楊士奇

宣德元年

朝廷以蘇松常鎮嘉湖諸郡姦吏土豪

肆爲貪虐以毒細民久而愈甚特降 璽書命大理

卿胡槩參政葉春巡歷訪察務去惡以寧善後又益  
以錦衣衛指揮任啟監察御史賴瑛槩等奉 命所

至秉公推明行之以果無所屈撓於是暴者以仆困  
者以起橫者以折弱者以立上之澤下流下之隱上

達數郡之內氛翳廓清畎畝間閭咸有生氣時事之  
裁制一董於胡然在葉之鄉邦知之素明而行之無

私葉益有助焉竣事還奏 上嘉之數人者皆進官

春進刑部右侍郎歲中得風疾 上命太醫視療久

未瘳奏乞歸從之後竟不起八年六月十八日也春

字景賜世家嘉興之海鹽其先本林氏考諱祥幼喪  
父母鞠於表兄葉某遂冒葉氏景賜幼警敏知學有  
才識洪武中舉自己巳史歷事吏部者六年永樂初禮  
部尚書李志剛知其通練能謹薦於 朝擢主客清

吏司主事階承事郎以勤敏周密爲上官所重三年  
陞本部郎中階奉議大夫進奉政大夫丁內艱去服  
闋仍舊職三考以績最陞兩淮都轉鹽運使歲餘丁  
外艱服闋改福建布政司右叅政仁廟嗣位來朝遂  
與廣西右布政使周 同被 璽書巡視應天鎮江  
蘇常湖松杭州嘉興八郡訪民利害而建華之歲餘

今上嗣位景賜復請蘇常諸郡者再已改四川  
布政司右叅政未行又二年而拜侍郎之命又二年  
而卒春秋六十有四娶吳子男三長懋次次森女  
一適吳孫男七觀鼎昇璿璣玉衡其葬在縣之大易  
鄉平湖之原於是懋奉事狀介翰林庶吉士 趙智  
來拜乞墓銘辭而不獲乃敘而銘之銘曰

仕歷中外才際時和厚靖惠敦執持恭勤劼毖勵職  
司行於鄉邦公弗私登貳六官荷眷知六十考終樂  
全歸來世有考視刻辭

刑部右侍郎陳鼎

實錄

陳鼎字重器廣東新興縣人舉進士爲監察御史巡按江西有聲擢建昌知府賜璽書獎諭馳傳赴任建昌有王府官校恃威羣行市井掠財傷人鼎擒捕正之以法由是歛跡尋薦陞都察院右副都御史未幾改刑部右侍郎正統二年十二月以疾卒遣官葬祭鼎持已廉蒞事慎雖居顯職而淡泊如初



刑部侍郎丁鉉傳

實錄

丁鉉字用濟江西豐城縣人以進士任太常博士歷工吏刑三部員外郎尋署刑部郎中有正統三年陞刑部侍郎鉉宅心平恕時論稱之嘗奉勅運茶西蜀奏減其常數以俟豐歲又嘗持節封松滋王有所賜與悉辭弗受尋又賑饑江淮暨山東河南撫循勞來出於至誠大發倉廩悉停不急之務民氣勃然鉉爲人姿貌潔白恂恂寡言退然若無所能人及任事綽有餘地至是隨駕行死于難遣官賜祭贈刑部尚書錄其子琥爲大理寺評事

刑部左侍郎丁鑑傳

實錄

丁鑑字永時直隸南陵縣人由楷書生員預脩永樂大典永樂十七年授行在戶部主事繼調吏部文選司復調禮部祠祭司二十一年 駕北征洪熙元年陞本司員外郎宣德四年丁父憂服闋調戶部正統初陞浙江鹽運使以廉能稱九年述職來京 上嘉鑑治行超卓宴賚甚厚仍命吏部紀名以待陞用十四年陞河南右布政使景泰元年召還陞刑部左侍郎已而爲御史所劾令致仕至是卒訃聞遣官諭祭命有司爲營葬事



刑部左侍郎羅公綺傳

崔銑

羅綺字尚綱磁州人宣德庚戌進士授監察御史遷大理少卿刑部左侍郎使虜庭還時松潘蠻叛董卜韓胡都指揮克羅俄監粲攻下雜谷奪其安撫司印土豪王永陷關堡殺人取貨都御史寇深不能治上降璽書命綺代之綺雄偉有謀能斷出奇取捷十不失一開布恩信臨以兵威末期克羅俄監粲悔過獻印禽永族之松潘皆山巖業羅立番得利卽奔巖洞匿木箐深不可測餉道出兩山間絕艱險民負載餽五致一羣番伺隙出輒奪米去綺曰不大威之不

懲招募材武得禪師智中國師綽領牌頭尤弄柯皆  
豪健各令統兵夜銜枚分道搗賊巢綺亦介冑從之  
火且攻破撲爬諸寨禽劇賊卓勞阿兒結十餘人戮  
之綺志在招降自是破剔體面一切以簡易治與接  
杯酒懽番人畏慕終綺任不敢叛後改副都御史亦  
坐是罷歸綺博學多智能屬文然少繩檢旣還磁淦  
水西作綠野堂號煮詩道人綺與鄉民王俊不相能  
俊如京告綺前在松潘受番人金暨器具詔奪綺官  
籍其家

刑部侍郎劉清傳

雷禮

劉清字廉夫直隸滁州人正統七年中應天鄉試第二再登戊辰進士改庶吉士性疎朗不羈然強記爲文如流水下筆率數千言立就兄定安道蚤世其事寡嫂盡禮及己巳之變虜犯德勝門百官分地守禦凡三日夜卽帥衛士督發甚勤知名拜兵科給事中巡視紫荆關口雅有威望事寧還朝是時行查山苗叛悖亂朝廷以清久在兵諸戎事命佐都督毛福壽討之是時禮部尚書童軒贈以詩曰明時仕宦作參軍帝令南征慰遠人紫氣橫空金劍冷綵雲炫

日錦袍新指麾雷動紅蓮曉談笑風生細柳春會見  
捷書馳報日定將勛業照麒麟於是進兵香爐山常  
以所得廩賜頒將士卽將士無不人人奮厲奏捷授  
刑部右侍郎尋丁內艱奉 詔奪情還部天順元年  
以事忤廷臣指左還四川叅政卒四十五清儻有  
風致不爲委瑣齷齪喜爲詩詩豪蕩直致卽老嫗少  
童可解其得之易如其文晚號樗菴又號水月主人  
今其家有樗菴集

水東日記云劉侍郎廉夫清余同年鄉舉自負文武  
才籌邊論兵歷歷如見景泰初爲庶吉士上書論時

事見用也先犯土城諸公主保衛京師廉夫主追擊  
頗忤意旣而出贊湖廣軍事王靖遠都御史王來皆  
有論薦還朝吏部擬還本科內批陞刑部右侍  
郎廉夫素嗜酒不拘細行頗不協士論天順初改四  
川叅政聞有詩云一封詔下九重天臺省諸公盡  
左遷自笑風流老叅政盡船簫鼓下西川



正議大夫資治尹刑部左侍郎孔公文英墓誌銘

公諱文英字世傑系出宣聖之裔大父諱彥明娶曹氏父志學娶蔣氏自彥明值宋季兵作徙家武安再徙邯鄲父志學又徙陝西西安化縣遂家焉比再世皆積行隱德弗耀于時志學生五子次卽公也公生有美質其父適入縣庠從良師友習舉子業中永樂十五年鄉試登辛丑科進士宣德元年初知江西廬陵縣未幾以事至京師擢任浙江道監察御史三年累奉詔書巡視北直隸民瘼事訖條奏所以消弭之方

大荷寵賚值浙江黃岩有健訟者構捏齊民三千人  
相聚誹張爲非公奉勅諭俾往體量鞠問公至則取  
其文狀究察端緒所自起遂得其所以構造者肯綮  
減之詞一訊衆情皆服立遣詿違之衆獨械首訟一  
夫來京處治人皆交口以明果稱之十年丁內艱正  
統紀元廷臣奉詔選能御史分理天下軍政公以廷  
臣薦乃驛召至京改河南道奉勅清理江西軍伍九  
年滿考陞支五品俸仍理前事正統五年陞湖廣按  
察使九年丁外艱部屬軍民狀公生平之蹟相率訴  
御史乞留御史會奏得旨報可奪情起復淮事後以

事至京師景泰紀元 今皇上詔擇有文武才謀可  
鎮邊關者吏部以公名上遂陞大理寺卿俾奉勅鎮  
守紫荆關及提督緣邊軍務公至練兵有法設險有  
要弛置得宜關備大飾內外晏然無警軍民皆得以  
樂生興事六年春上以刑部左侍郎員缺且邊關無  
事乃驛召公補其缺次年爲景泰七年二月卒于官  
詔如例遣官諭祭脩墳安葬公性資溫厚居家孝友  
接人謙和於世利澹然寡嗜好既力學尤通吏事登  
科爲名進士治邑爲賢令尹出入風憲綱紀卓然鎮  
守邊關事功就緒入貳秋官庶獄明慎其行歷官大

飾可見如此

前刑部右侍郎黃公仕簡墓表 周洪謨

公諱仕簡字庭臣姓黃氏世爲富順人祖諱桂林父諱智皆以公貴贈刑部右侍郎母張氏封太淑人公生未晬而孤太淑人撫育之自幼穎敏絕人書一再讀卽成誦甫弱冠於五經四書諸史悉通大義入邑庠爲弟子員一時流輩皆師事之宣德戊午領四川鄉薦第一壬戌登劉儼榜進士以儀觀文學選兵科右給事中公在育路知無不言然小心謹恪凡所論奏必委曲開諭以俟 上裁未嘗以言事得罪三載秩滿復膺 勅命陞本科左給事中久之陞太僕寺

左少卿先是馬多耗每歲民鬻子女以償公往屬  
等府延視革生馬死見軍民以車載小口賣以買馬  
者相繼於道歸卽覘其可矜之狀上爲畫獨所負  
時北虜寇邊上命公偕左都御史王翱經制其事  
王方以風節重天下同列鮮當意者公出謀發慮出  
人意表王深器之遠相與歡洽如平生還朝言天下  
大利害前後章奏凡數十上多見采納丁丑英宗  
皇帝復正大位簡賢圖治而公進刑部右侍郎公治  
獄平恕務得其情民有犯奸者女誣以強獄成法當  
成公獨疑之請再鞠不一其語具得誣狀會山東凶

有旨擇大臣賑濟衆皆薦公乃奉勅以行得便  
宜行事公處置有方全活者甚衆一旦坐累貶廣西  
叅議逾三載公念太淑人老遂以疾力辭詔許之  
乃歸成都買田宅居已而與公同坐累者相繼登用  
故舊慙慙公起公弗從日引觴賦詩以爲樂于于如  
也公天性至孝大淑人春秋高不能行愛遊院落園  
圃間公親扶或自負不以委人及卒時公年已七十  
禮七十不行喪而公哀毀踰制每念不及事其先君  
子終身爲恨歲時感泣爲人溫恭樂易不爲崖岸峭  
絕之行接人無賢愚貴賤皆有恩禮而待親戚尤篤

其自奉儉約雖貴食不兼味一裘十數年不易至於  
周人之急則無少吝貧不能殮者爲買棺居成都時  
隣婦有亡首飾者其舅姑責之切欲自盡公爲製補  
成化甲午卒所著有詩文二十卷藏於家素工草書  
筆力遒勁有鍾王家法鄉人得之者重如珍璧



通議大夫刑部左侍郎贈刑部尚書謚恭敏廖  
公莊傳

表表

廖莊字安止江西吉水人也宣德五年進士選庶吉  
士十年擢刑科給事中正統六年陝右饑命莊賑之  
率以便宜行事全活者甚衆比還多所建白時楊士  
奇當國家人有不法者莊率同列抗論之八年陞大  
理寺左寺丞十一年陞南京大理寺左少卿景泰五  
年上疏請朝謁南宮及加恩禮於上皇其略曰臣  
仕中朝十餘年間見上皇臨朝遣使冊命邸邸歲  
時令朝臣謁賀于東廊恩禮隆洽羣下感動今上

皇深居南內問安侍養大聞曠闕非所以篤忠愛友  
悌之誼慰天心而召和氣也且上皇之子猶子也  
宜令親近儒臣講明經義輔成德器以端國家之本  
以繫天下之心由是忤旨明年丁母憂入見命撻於  
庭幾死明日謫河州定羌驛丞與曳就道天順元年  
召還爲大理左少卿時母服未幾聞外艱遂陳情命  
賜祭葬特恩也服闋調南京大理寺五年陞南京禮  
部右侍郎七年調南京刑部成化改元御史有言莊  
者上斥不聽遷刑部左侍郎且曰莊大節可取踰  
年病卒贈刑部尚書謚恭敏莊坦直然性剛急數面

折人尤篤故舊客嘗滿座既拜法官所親或勸稍謝  
往來以遠嫌議莊笑曰臣門如市臣心如水吾無愧  
吾心而已既沒無以爲歆鄉之仕于朝者哀貸以相  
之

刑部左侍郎曾暈傳

曾暈字時升江西泰和縣人宣德八年進士授刑部主事遷員外郎郎中景泰元年陞廣西右叅政承檄核大獄有殺人者致金數十斤峻拒之因具獄尋改河南天順五年陞山東右布政使戚畹欲奪民田部使者方依違暈極言不可乃已成化元年轉河南左布政使時荆襄盜起豫時銀粟以備餉餉官軍賴之四年召爲刑部左侍郎仍給從二品俸六年巡視考察官吏首去布政使張清人頗爲之不平九年乞致仕去上登極以照例進階資善大夫弘治四年正

月卒于家賜祭葬如例。量性質實。歷官四十餘年。勤  
慎不渝。所在供職。同列心師。事之晚節。家居不入城。  
府歿之日。家無餘資。鄉人高之。

資政大夫刑部左侍郎曾公暉神道碑

何喬新

弘治四年春正月十有五日刑部左侍郎曾公以疾卒于家吉安府以聞 聖天子嗟悼特命諭祭營葬費皆官給之公諱暉字時升世居泰和之上模曾祖德榮賢而蚤世祖存吾考忠良再世不仕而以德義聞俱以公貴贈刑部左侍郎妣劉氏繼母郭氏俱贈淑人公幼穎敏嗜學書一過目終身不忘宣德壬子以書經中江西鄉試明年會試中第二名廷對 賜同進士出身觀政工部奉部檄往陝西治 永興王

葬事藩臬故舊餽遺悉拒不受歸謁少師楊文貞公  
文貞知公拒餽事大加獎慰除刑部山西司主事公  
治獄證逮訊鞫務求其情老於法家者自以爲不及  
丁父憂去服闋改刑部浙江司正統七年海寇作亂  
沿海衛所多以無備偵事 英廟命戶部侍郎焦公  
往飭兵備焦公奏以公從行凡將士有舉者悉屬公  
治之而守戰方略一惟公言是用及還焦公語朝士  
大夫曰曾主事有猷有爲可大用也文貞公聞焦公  
言亟欲薦擢會薨不果九年陞陝西司員外郎大司  
寇金公濂以諸司奏牘浩穰命公典之獄有關權貴

者諸司或跼蹐不敢治金公常以屬公公無所左右  
一斷以法由是賢聲益著秦府誣奏巡撫都御史陳  
僖敏公私于樂婦朝論疑駭公逮樂人治之立得其  
情遂劾奏者妄而白僖敏之誣尋陞湖廣司郎中時  
有例方面有缺命大臣各舉所知先公時爲吏部侍  
郎素知公賢遂以公薦陞廣西布政司右叅政廣西  
租賦多逋徵督苛急民不堪戎伍逃亡而冒支糧餉  
如故公乃稍逋租之籍諭令漸輸戎伍實數停其冒  
給繇是邊儲漸充思明土官知府黃鉅與都指揮黃  
鉉族兄弟也鉉殺鉅父子詐言爲盜所殺獄久不決



公奉臺檄會勘鉉以黃金二十斤賄公請緩其獄公  
拒不納具 奏其臯會鉉以陰謀得脫且徵用之衆  
爲公危公自若也太平府與交趾隣永樂中運鹽以  
餉征交之師及兵罷鹽留太平者歲撥民丁看守民  
苦之公具奏以鹽折俸而罷遣守者民皆歡呼丁郭  
淑人憂去服闋改河南時清軍御史務多得軍以補  
伍公與共事嘆曰兵民異籍豈可誣也有可辨者輒  
爲辨之會言事者謂天下多冤獄請委官審辨河南  
以屬公公精察詳審多所平反 英廟復辟公來朝  
因言每歲先軍糧運至臨清倉復出先軍出納多弊

乞改水次交兌爲便 上允所請至今行之南陽諸  
縣多流民衆議一切驅逐人情洶洶公曰彼不過徭  
役耳急之且變生遂與巡撫協謀止之衆乃安天順  
五年陞山東右布政使所居官署相傳有妖前任者  
不敢居公居之不疑旣而妻子歿于署衆因勸公先  
徙公曰歿生命也妖何能爲山東舊苦塞河之役又  
汴罹水旱公殫心賑恤凡河役所需多方區畫不以  
煩民曹州奸氓有指民新墾田爲無糧者以獻戚畹  
部使者檄公丈量公曰舊令許民墾荒永爲世業今  
欲丈量起科得無不可乎部使者深然之遂止成化

元年轉河南左布政使河南人皆喜曰吾父母來矣  
刑獲盜起公念朝廷出師征討必道河南預命郡  
縣儲糧餉具芟芻兵至給之民以不擾歲饑民缺食  
而貴軍需銀數萬兩公私無所措公會計開封倉糧  
甚多乃出官糧百餘萬石平價糶之饑民賴以濟而  
軍實亦無缺四年陞刑部左侍郎仍給從二品俸明  
年憲廟命公巡視浙江許便宜行事公徧歷郡縣  
問民疾苦考吏治得失庶官以不職黜者數百人皆  
以爲當省重役減官租誅奸吏禁刁訟局匠歛絕者  
減其歲造之額銀場礦絕者停其歲輸之課官司冗

蓋者革之巡徼當設者增之民皆稱便踰年乃歸中  
貴怙寵殺人事覺公具奏逮治奏上不報衆爲公危  
之越三日奏下卒從公請部臺科道皆吐舌以爲難  
九年公自陳老疾懇乞致仕 上念公實多病許之  
及辭特 命光祿寺賜宴公既抵家絕跡不至城府  
每風日清炎徜徉泉石間歌詠以自適巡按蒲臬議  
歲撥皂隸四名送公家供役公辭不受會有 詔文  
臣致仕者五品以上進一階廉且貧者歲給半俸有  
司以告公奉例進階資善大夫卒辭俸及得微疾子  
孫侍者費稍異問所苦公笑曰吾今日得正而斃矣

請曾子啟手啟足之言渣然而逝公廉慎君子也清  
靡若不勝衣及其有所執萬夫莫奪不可以禍福動  
也自入仕以恬退自守深耻奔競爲郎中時或語以  
一追大臣門公卿可立致公笑而不應其執法未嘗  
少徇或謂非保身保家之道公曰吾所知者法耳它  
非所恤也公之位不滿其德故施於用者不盡所蘊  
然所謂古之大臣者公無愧焉

刑部右侍郎林公鶚墓誌銘

丘濬

成化十二年十二月丁丑刑部右侍郎林公卒于位  
皇上震悼命翰林院撰文禮部官諭祭工部營葬事  
其諭祭之文有曰存心正大操履端方有守有爲  
賢聲日著士大夫凡與公厚者方以公不幸不極其  
用而遽爾隕逝爲憾及得諭祭之文莫不感嘆稱誦  
咸以謂皇言雖簡而公平生大槩盡見于此歟且  
不朽矣公諱鶚字一鶚其上世自閩之長溪徙白之  
黃巖近析邑之太平鄉爲縣故今爲太平縣人曾大  
父諱養民號石林大父諱從恭俱不仕父諱純仕爲

湖口縣訓導母趙氏生母程氏公登辛未進士第明年拜江西道監察御史階承事郎三年考稱給勅遷階文林郎贈父如已官封嫡母太孺人丁丑擢鎮江知府壬午當道者以鎮江事簡而公才長於治劇請與蘇州知府姚堂兩易其地詔如其謀公在蘇州僅一年超拜江西按察使又三年卽遷右布政使尋轉左廣宣拜南京刑部右侍郎附嘉議大夫未幾丁太孺人憂服除召爲刑部右侍通前任滿考錫誥進階通議大夫贈祖及父皆刑部右侍郎母趙加贈淑人生母程始封大淑人公始終歷六官再守大

郡貳刑曹於兩京出入中外率稱官守其爲御史時  
適朝廷方重臺諫一時言事之臣摺摭過實公獨  
持大體略細故有所不言言必當其實與山陰沈性  
齊名而簡靜過之時舉以總三法司奏案士論推重  
嘗監京府試大臣子有不預薦者意考試官故黜落  
之以沽強直名誣其取士不公公邑人林挺適入試  
在中列疑公有私違挺考訊將中公以法及弔所試  
卷考驗皆如格事遂得白英廟復辟凡前日言事  
臣過訐者率左遷其官特召大臣擢其得大體者如  
大郡公得鎮江 陛辭召見諭以權用之意賜食大



官兼給鈔爲遊里費公戚 上知遇至郡舉儒補  
見前政之廢弛者次第興舉之未嘗一言暴前人非  
其調蘇郡俗喜夸詐好興作公一切鎮之以靜其所  
建章必詳審至再然後施行蘇人以公有雅望責旦  
夕效於是頗有後言久而見公所處置事一一各有  
深意然後帖然大服鎮江曹河經孟渚頗險言者請  
鑿河自七里港引金山上流通丹陽以避之巡撫主  
其議公以其迂遠而多石且壞民田廬墓甚多言於  
大臣請按京口閘甘露壩故跡因而浚之以通舟楫  
春夏以閘秋冬以壩則道里近而功力省從其言果

便至今過者必指曰此林太守之功也蘇學廟像歲  
久多剝落或欲因其舊而脩飾之公奮然曰塑像非  
古我太祖於太學易以木主百年夷俗乃革彼未  
壞者猶當毀之幸遇其壞易以木主有何不可或以  
壞聖賢像爲疑公曰此泥土耳豈聖賢孔子生於佛  
教未入中國之前烏識所謂泥像哉况古人席地而  
坐政不如此聞者皆服廉憲江西一時僚貳分巡各  
道者人異其兄往往用已意出入于法公一正之以  
律多所平反廣信民妄傳天神夏尚書等遠近驚疑  
公榜諭之且戮其魁其恠遂息又嘗以歲饑奏減恒

賦十五萬石禁樂戶買良爲婦過嶺南囑冠不使人  
境江西士大夫至今稱良方面者必歸焉在刑部三  
年罪無大小必加研審其或未當必從容請于大司  
寇務得其情合于法而後已故獄經公者咸稱無冤  
云公事之暇輒危坐閱書史臨古帖作楷書夜分乃  
止五鼓輒起率以爲常聞人有異書必求之既得手  
自校讐有未安者訪善本是正奉身儉薄甚簡言語  
少嗜好待下過嚴而於交游不苟合事母程淑人尤  
極其孝敬母性嚴終日侍立未嘗少暇以辭色有所  
不愜意則跪請移時雖終夜不敢離左右家事大小

必以咨決焉於乎若公者豈古所謂篤行君子者歟  
通議大夫刑部右侍郎太平林公神道碑

長洲吳寬

天順丁丑英宗皇帝既復位庶政更新尤重守令之  
選有詔吏部卽廷臣中推擇其人於是刑部右侍郎  
林公以監察御史得知鎮江及行特命降辭如方岳  
官禮更至文華殿親加獎諭復賜宴闕下且給楮幣  
爲道里費異數也公感激奮勵至則數舉善政專以  
安民爲事故吏部尚書崔公方巡撫其地欲別鑿運  
河以避江行之險公不可曰古運河因在可卽此浚

之非特省民力而已用其言時皆稱便公既不以爲  
書自解而尤謹於禮法事上甚恭不爲時俗趨諂  
文移偶誤或令自劾免罪卒不從其自持如此在郡  
五年民晏然以樂巡撫都御史劉公以鎮江不足勞  
公治奏更蘇州去之日父老送之爭願留公屢懇于  
府門公謝以非禮乃已蘇事劇公精勤益甚訟牒滿  
前剖斷緩急各有次第有好訟者故淹之獄中以困  
苦之旣而事簡以其暇日入學宮進文士講業若無  
事者公旣望重于時久之人皆信服曰公非俗吏也  
憲宗皇帝之初以政績最著特權江西按察使江西

訟益多治之悉得其情嘗有犯大辟賂達官求生者  
公不爲動執之愈堅俄有廣寇踰嶺行劫額之龍南  
信豐二縣勢熾甚同官方欲爲避難計公慨然約武  
臣調兵剿之寇聞而遁廣信人妄傳妖神誣惑鄉里  
公寘其魁于法仍榜諭其衆傳者遂息進右布政使  
踰年轉左布政使政令所及人益頌其賢朝廷知公  
可大用召爲南京刑部右侍郎屬吏素知公名爭自  
修飾雖寮長亦嚴憚之丁內艱去任吏部計公服闋  
數擬進用竟改刑部右侍郎持法平正屢與同列忤  
至權要請託不行積怨已甚亦不恤也偶被疾少間

猶夙興而朝退而治公事以成化十二年十二月八  
日卒享年五十四公貌莊重眉目秀偉望之聳然平  
居對妻子無惰容見小吏必束帶性更孝母夫人嚴  
厲聲色稍不和輒跪以請罪延接士大夫禮度雍容  
見後輩可教必加獎進後多顯于世自少嗜學公暇  
輒手一卷不釋凡古人議論往往成誦作字雖率爾  
亦楷正不苟爲郡多正繆俗鎮江祀漢隱士焦光爲  
是服象及左右侍衛如王者公以爲非法始易去至  
蘇且易從祀孔子諸賢塑象爲木主及秩鄉賢祀典  
次第先時歲迎春于東郊百戲前導觀者塞途公悉

屏不用識者以爲合禮公諱鶚字一鶚其先爲莆陽  
林氏出唐金州刺史嵩之後五季徙台之黃巖今黃  
巖析爲太平縣故爲太平人自宋歷元業儒不顯入  
國朝子孫始出取科第多爲名宦公之卒朝廷旣遣  
官諭祭治葬如制後十六年復命其子薇爲國子生  
於是薇來告曰先人墓道未有銘敢請寬自爲諸生  
蒙公知愛公之平生實知之謹述其大略而爲之銘





通議大夫刑部左侍郎張君錦墓誌銘

李東陽

刑部左侍郎張君諱錦字尚綱系出河南太康籍于  
岷游于秦安卒于華將葬于秦昔陝地蓋張氏居太  
康已久自居高祖諱敬仕元爲叅知政事防禦郿延  
在國初以謫戍故居岷至君爲五世君在秦安爲  
縣學生岷爲衛學生其居華以謝病故其歸岷以治  
命而葬則朝廷所命有司所治也君舉成化乙酉  
鄉貢己丑進士試政刑部見稱爲才有富民坐法當  
死權貴請貸不得則與執政者構君君欲發其姦乃

已授山東司主事署員外郎鞠訊明審錄囚山東平  
反甚衆署郎中事益精判決獄無滯囚會他司失官  
金尚書屬君按之疑主使鞠之不承遣人給其家得  
金示之遂伏罪畿郡災君用廷薦往賑先條奏便利  
至則平糶勸貸分遣良吏饘丐乞舉嫁娶掩骼埋瘠  
游惰者給牛種督之耕築行唐隄千二百丈以定水  
患所活不可勝紀有邏校誣棗強武邑二縣民爲盜  
皆據理直之 方山慶成二王府有大獄奉 命往  
治遷大理右寺丞再奉 命治 岷襄二府獄情罪  
皆協果遷右少卿 憲廟知名鳳陽有重獄特 命

之往 今上卽昨時爲都察院右副都御史巡撫宣  
府直枉除弊兵民畏服劾罷中官武將之守備不職  
者聞登陴望見武帥家假山甚麗恠之其家聞之遂  
自撤去虜報猝至或欲請官軍適 朝廷遣中使就  
議公附奏以爲不必遣竟亦無他請立萬全左衛龍  
門所學置天下武學歲貢額皆舊所未備也丁父憂  
服閔巡撫保定諸府兼督紫荆諸關未行遷官再勘  
湯陰府獄有貴臣爲都御史秦公紘所劾賊以萬數  
怙執求免公卒正其法丁繼母憂服再闕方復任未  
幾遽疾作辭俸不許乃請告特給驛歸且令病愈有

司以 聞其爲 上所簡任如此其卒也特令翰林  
爲文遣有司卽其家祭之公少有異質生窮邊無師  
友從釋氏學旋習老子及讀儒書始盡去舊習獨冠  
儒冠不避譁笑攻苦力學竟以所得取高第鄉之以  
儒顯者自公始其爲人敦孝友重廉節早失恃事父  
甚謹撫諸弟無間言憫窮赴急或假貸爲賑卹其在  
官勤敏彊幹不爲事窘章奏明暢動數千百言又典  
刑獄尤精法比而能以寬恕將之服念愍恤每至驗  
諸夢寐歷佐臺省前後十五年資望俱積而不及大  
拜以沒論者蓋深惜之然其所自立亦可謂卓犖不

羣者矣所著有松壑小稿宜政錄張氏宗譜若干卷  
藏于家

通議大夫刑部右侍郎魏君紳神道碑銘

李東陽

君諱紳廷佩其字充之曲阜人也曾祖甫友而上皆  
未顯祖綱考國子助教鳳皆贈刑部右侍郎階通議  
大夫君少爲縣學生試鄉闈已在選比拆卷監試者  
以其年未成童弗錄自是屢不舉成化丁酉舉于鄉  
時年二十六尚未娶藩臬諸官長愛其才爭相俸相  
成之辛丑登進士第奉使韓府歸始入刑部爲主  
事至弘治戊申累遷至郎中精練法比擬以動慎獄  
無滯囚尚書以爲能俾總諸司奏牘兼署三司印廣

西有冒稱外戚者已被爵賞事覺被逮皆避不敢承  
君一訊卽得其狀遂伏法辛亥擢南京大理寺右丞  
叅政明嘗人至錄其藁以傳戊午擢都察院右僉都  
御史巡撫山西邊警方急君親閱戎旅部伍增氣竟  
亦無他歲且旱民苦徵稅君奏減四分之一又增築  
偏頭關邊牆四十餘里增墩堡五十餘所 朝廷賜  
璽書文綺往勞之又廓寧武關城募土兵置營舍皆  
昔所未備者癸亥遷右副都御史總理南畿諸府糧  
儲值大饑民歎徙相繼君極力賑貸凡賦稅夫役工  
作諸勞曲爲省節崇明有海寇勢甚熾君重興師旅



欲撫定之祗械其首惡後守者弗戒而逸非初意也  
乙丑 天子卽阼於是有侍郎之召其卒也 遣官  
諭祭命有司治葬事云君五歲喪父哀慕如成人七  
歲承其母闕里孔淑人口授書史居喪廬墓側蔬食  
三年事前母諸兄甚謹在鄉鄰以信義聞與人謙厚  
不恃才智爲陵轢善吟詠能文翰祗自娛適藏其稿  
于家

刑侍李士實傳

士實字若虛南昌人踰冠舉進士爲刑部郎久之稍遷按察副使視浙江學累擢山東左布政使進副都御史入爲刑部侍郎謝病歸士實所居職多善狀名能文章談道理而尤以書法稱張元禎羅倫其鄉大儒也士實與齊名于官尤善李東陽林俊楊一清時翕然譽之歸數載召爲右都御史年七十二乃上疏致其事詔特予一子官賜勅來錄馳傳續食然士實家頗近寧王王詫其富彊有異志盛欲交士實不可遁縱其下侵辱之不得已往見王坐語良久王大悅

曰公吾子房也士實因更爲寧王畫策厚以金帛  
權貴人使日夜譽王太后及上前且屈指曰上固  
好游酒色得久耶王從取大位不過一宦官力耳士  
實辭歸王所以賂遺珍異甚厚而尋會王謀稍稍露  
而御史告變置獄推王事急舉兵及因生辰殺都御  
史孫燧按察副使許達後一日使使召士實親出城  
迎來坐士實謂曰王奈何輕舉事王曰縣官固發之  
不得緩則問孫燧在耶曰殺之矣士用許達耶曰殺  
之矣士實意不懌然業以許爲用乃強起拜賀王卽  
僞位號士實爲太師兵十餘萬前發至安慶攻城不

下歿傷以千計士實勸王無攻及南都未僞襲之可  
得也會王已內入都御史王守仁反間不聽聞南昌  
潰卽日還遇守仁兵于江口大敗士實被執見按察  
使伍文定立不跪文定怒撻之二十創甚歿獄中乃  
劉其屍子孫靡子遺矣逆史氏曰於乎茲非以壽爲  
辱者耶卽士實不八十歿當天子恩極榮哀之盛何  
以至此極也士君子等歿耳歿獨遺骸千萬年何心  
哉士實自爲墓桃花鄉甚壯使李東陽志之竟不得  
葬矣

刑部右侍郎郝志義傳

官錄

刑部右侍郎郝志義字宜之陝西清澗縣人成化己丑進士授大理評事進寺副陞山西按察司僉事整飾鴈門關等處兵備陞副使坐事左遷福建都轉運鹽使司同知明年復陞福建按察司副使以憂歸服闋改山東陞四川按察使歷山西四川左布政使陞右副都御史巡撫湖廣進刑部右侍郎未上而卒時正德元年十月子舉人序奏乞祭葬逆瑾以其雅不附已銜之寢其奏仍革序舉人瑾敗乃復志義性嚴毅狷介待已處人皆循蹈燥燠居官以廉慎著聞人

無能訾議之者

刑部左侍郎葉贊傳

實錄

葉贊字崇禮淮安山陽人天順甲申進士任刑部主事歷員外郎郎中鞫讞明慎人稱不冤出爲嘉興府知府改台州廣信以操履清謹聞旣去民皆思之遷四川布政司叅政江西左右布政使徵拜右副都御史總督南京糧儲藩條以故事餽贐贊謝不納其督糧儲嚴出納清宿弊繼者多遵其法轉南京工部右侍郎又轉刑部請老而歸足跡不至公府郡大夫賓之鄉飲亦不赴正德七年六月卒賜祭葬如例

刑部右侍郎魏富傳

實錄

魏富字仲禮福建龍溪縣人成化丙戌進士授監察御史陞浙江按察司僉事進副使重舞文告訐之禁有豪猾誣縣令同列知其情莫敢辨而移於富富爲直之浙東岸江田爲水所囓富命築石隄凡捍田若干頃歲饑賑貧民所活甚多弘治初陞江西按察使五年陞都察院右僉都御史整飾薊州等處邊備兼巡撫順天等府以病告歸十一年至京改南京大理寺左少卿尋陞大理卿正德初陞刑部右侍郎遂致仕正德八年六月卒祭葬如例



通議大夫刑部左侍郎張公鸞墓志銘

王九思

刑部左侍郎張公者諱鸞字應祥西安咸寧人也曾祖曰景德祖惟義父約皆隱于賈有資而好禮爲三秦故家云前母李氏生子秦臻母趙氏生子鳳及公公四歲喪母而繼母王氏生子騫矣顧獨愛公唯父亦甚愛之以爲穎悟可學舉進士餘子皆以服賈其後父卒而公竟以父命爲縣學弟子員受毛詩舉成化戊子鄉試辛丑舉進士第爲大名知縣是時縣中百物俱廢教倉空虛奸豪侮法又衛河每漲而瀕水

諸田盡爲之沒百姓患苦之公至修墜補敝誅鋤豪強積穀備凶幾萬石築堤扞水不害耕作詞訟清理遠近稱爲廉平當是時寧山衛胡指揮者其妻妬甚家人皆疾之乃胡指揮一旦中風歿其子卽誣其妻毒之歿而獄成會御史下公案問其妾得以無歿先是巡撫都御史侶公鍾以南樂壯縣奏書引公治之而大名民伏闕奏留不得調至是吏部竟以調公是時南樂之民以歲旱而餓及流亡者又甚衆也公至天乃大雨然新穀未登無所賑給乃請于巡撫都御史得二千金請于大名府得六千金又請于賑濟郎

中得穀若干石民由是蘇矣其後歲熟乃以役民百  
工告成無所怨嗟而又崇道興化培養茂異貢舉之  
選超于往昔又綜理其馬政馬政修舉旣考績三載  
已于是徵拜山西道監察御史久之監督通州抽分  
弘治戊申視茂陵役徒會繼母喪以歸終喪復其官  
乃奉璽書巡視居庸諸關從容言便宜事而曰隆慶  
衛守望官軍例以前半歲給餉于京倉而道遠且費  
得之甚難臣以爲于本衛倉便長陵衛官軍例摘二  
百在鎮及買兒嶺隘口操守以爲老家荒涼貧苦蓋  
不可言其量給行餉四十底幾其有濟焉黃花鎮有

倉去延檢司六七里而以巡檢代署甚非便也請選  
官撥給印記署曰黃花鎮倉紫荆關浮圖峪口實襟  
喉之地也而官軍月餉乃給取于他處其傳報緊急  
乃又缺馬二者非所以養士禦患之宜也臣以爲于  
本地置倉給馬五十匹便奏上 敬皇帝下戶部兵  
部議報可及代復兼督通濟白河抽分而三載考績  
勅贈父母及其妻居無何出按四川老成務持大體  
不矯激立名其布按諸司官材能異等或有小過若  
禮貌未至輒旌拔弗與校也若貪墨弗事事雖諂必  
劾罷去郡縣吏以不職問罷者若干人然鄉里故舊

廉能著聲亦與存問不廢推舉焉而又裁省浮費飾  
理兵政修繕城池興作庠序表章忠節推舉隱逸先  
後奏議以松潘諸處及成都諸郡縣舊有添設官員  
未宜裁革于成都府則宜添設諸官以分理水利倉  
庾督捕盜賊于後寧地方則宜以酉陽洞長楊冒弘  
之子丘授之土官巡檢以靖夷禍詔皆如御史議又  
以馬湖土官知府安鰲恣橫有端宜先事撲滅而鰲  
果以此敗而人亦以此服公及代歸而都御史屠公  
濬總院事雅重公以公掌諸道奏事戊午冬十一月  
清寧宮災乃奏上八事其一曰法司修纂條例宜早

完輯以省刑罰二曰言事諸臣宜優容以開廣言路  
三曰巡撫都御史宜量材授任邊陲與內郡異未可  
一槩予人四曰濫放俸金五曰優恤小民六曰明慎  
用刑七曰行取差官八曰量減抽分 敬皇帝爲罷  
行之其後滿九載而都御史閔公珪推轂御史首及  
公會屠公爲吏部于是擬公大理寺丞不果乃陞浙  
江按察副使巡視海道奉璽書巡視者六年自是倭  
寇遠遁海道清肅矣而巡按御史先後論薦宜不次  
擢用用是超遷爲大理寺右少卿未久而鎮守河南  
劉太監與周王訐奏諸不法事 天子降璽書命公

與司禮太監錦衣指揮卽其地案問乃具得其事報  
犒寶鈔羊酒是時 天子新卽位上尊兩宮于是誥  
贈父爲大理寺右少卿贈封母及配俱恭人未久轉  
左少卿正德丙寅春遣祀西嶽及歷代帝王陵寢蓋  
以卽位告云其明年陞左僉都御史理院事御史王  
公時中巡按大同詣邊忤權貴人權貴人怒欲置之  
死公與一二都御史奏書救得不久發戍遼東今復  
起位至都御史矣又太監張璠者奏言豐潤縣皇庄  
地土苦百姓侵漁而寶奪之田于是 天子降璽書  
命司禮太監戶部侍郎同公勘問百姓賴以無事詔

陞俸一級未久轉右副都御史仍理院事兵部題命  
清理貼黃尋復起拜大理寺卿得侍經筵仍管黃戊  
辰春正月陪祀南郊越翌日宴慶成得坐奉天殿三  
月廷試進士充讀卷官是時纂修資治通鑑成得賜  
又賜御製寫懷題文諸詩五月從駕萬壽山觀驛騎  
賜宴文華殿前九月復轉刑部左侍郎是時江西上  
高縣民奏許侍郎黃景諸不法事 天子降璽書命  
公司禮監太監錦衣衛都指揮同往案問然曩在大  
理寺會天下多事案牘委積公自理之勞傷目弗視  
而已已秋歸自江西疾愈益甚失明于是乞骸骨歸



川不許乃以江西事忤劉瑾僅免禍得致仕歸既歸而瑾怒不止罰米二百石蓋公之爲人也介直不善阿附瑾故極怒如此而公于是杜門惟蔬食歲時伏臘賓客燕會不設具不御音樂曰令子孫後世知吾儉非公事不至臺省不談時事然乃好杜甫詩兒子吟誦其側日聽以自娛焉辛未秋乃病目復明平時學士大夫無不嘆息歌詠俱壽者又九年而已卯夏終于正寢距生蓋壽七十有四歲云訃聞天子諭祭命有司營葬事

嘉議大夫刑部右侍郎王寅墓誌銘

楊一清

敬夫姓王氏名寅敬夫其字也別號敬齋少補邑庠  
生領成化庚子京闈鄉薦辛丑登進士第授大理寺  
右評事進寺副弘治壬子遷福建按察僉事辛酉遷  
陝西按察副使正德丁卯遷廣西按察使己巳遷四  
川右布政使召拜太僕寺卿庚午擢工部右侍郎  
辛未改戶部奔父喪歸守制服除甲戌改刑部到官  
幾一月而病再疏乞休致不允疏三上詔許歸  
養疾疾愈起用歸兩月而卒蒙賜諭祭命有司爲

營葬域初敬夫爲諸生嘗執經從子遊愛其說而文而又動循矩則及爲評事執法比惟謹權利不能奪山西豪右有坐法當死者懷白金二千求脫敬夫怒曰胡爲以是加我將執其人懼走自後子與敬夫俱外補比子徵拜太常始聞福建大夫上稱按察官之有風采令行禁止豪強屏跡賊吏望風解印綬者必曰王僉事又稱有運籌策勦海洋羣寇中嚴號令寇畏威遁去海道肅清者又曰王僉事間有議其過嚴議者謂今世平人玩姑息之風勝固宜糾之以嚴不足爲累也後子受督理馬政之命於陝西久弛宿

弊卒難釐革乃檄敬夫分理其事稽牒按籍不遺餘力復墜緒於磨滅之餘還牧地於官數萬頃其功居多至其分巡諸道理戎務覈邊情所至刮奸剔蠹拒請託制強禦陝之人多能道之 韓藩支庶因姦毒

一女子死井中初有司誤坐他人獄且具予廉得其實屬敬夫治之有緝袍玉帶者造敬夫所出寶帶一束請曰願救吾兒敬夫正色拒之竟論如法在廣西二年一方之獄稱平而簡易安靜不失柔遠之體川藩命下會西北邊警告急 詔廷臣舉習知邊務者數人以備用敬夫在列被徵爲太僕馬政一新爲工

部專理易州山厥剗繁析紛得其機要完逋負二十  
餘萬敬夫性至孝痛母氏早棄養語及輟廢飲食撫  
其弟宥自襁褓至成立誨教如嚴師獲舉於鄉以需  
進士之選俸貲所入恒分其半以供菽水嘗迎父翁  
於易州公署口體心志之養成備罔缺置義倉以周  
族之貧者婚喪取給焉其居父喪哀毀屢絕時方寒  
塊苦擗踊摧割不自惜故疾乘之敬夫襟度弘曠其  
之廣也過洞庭大風將覆舟舟中皆懼無人色敬夫  
神氣自若曰吾果獲罪於天風覆吾舟頃之風定病  
不諱歟屬續前三日請於繼母貫曰不能終養奈何

至日呼其弟若子暨其族姻屬後事畢索深衣幅巾  
着之奄然而逝年五十有七

刑部侍郎楊茂元傳

雷禮

楊茂元字志仁別號麟洲世爲浙之鄞人考諱守陳任吏部右侍郎兼詹事府府丞贈禮部尚書謚文懿自幼穎異殊常甫七歲適太僕錢卿璉館其室誦釋經甚寒茂元旁笑之因試令讀之一二過卽背長益領悟文懿一以聖賢之學是訓成化元年碧川發解偕如京始習業舉子語卽驚人七年鄉試第五十一年會試第四廷試第二甲第七是歲秋八月授刑部陝西司主事練習法比大司寇林公聰大器之卽政有于三法司者悉令兼理人謂之掌三法司蓋慎

縣志時有巨璫占民產場若干頃訟與多方致屬盡  
以歸民同年楊仕偉者爲同部主事中最注直誣以  
受賄事結徵賊仕偉以乃祖大傳公 恩賜銀四十  
兩輸之不足又稱貸以益時忌直莫之敢與乃違衆  
假之隨署其封曰刑部主事楊某俸銀十兩直見之  
歎曰好膽氣仕偉之誣遂白十七年陞福建司員外  
十九年陞四川司郎中明俱益著二十二年奉

勅錄南直隸囚舟次邳州夢血面女子訴冤一夕三  
至且稱已訴成善矣叅明詢之成善乃衛巡捕官先  
有告者含糊不明但言屍所耳乃令覓其屍果得蓋



此女餉夫之叔於田時求姦不從怒而鋤其身歟遂  
塞之拘審卽伏凡情可矜疑者多所平反迄今人錄  
其論奏以爲式二十三年陞湖廣按察司副使清理  
屯田屯田奉勅自茂元始巡撫樂都憲推重其才  
有大獄輒委理之案牘叢集從容剖決罔弗精當先  
是官廨多巢莫敢居者至卽居之從者夜聞戶外人  
言福星至矣竟寂無譁弘治二年冬聞文懿訃歸繼  
遭母夫人憂六年服闋授山東按察司副使適河決  
張秋孝廟初命劉都憲大夏董其役繼命大監李  
興平江伯陳銳共治之興銳事多不法乃抗疏首言

治河之策次言水者陰象其應爲後宮爲夷狄請戒  
飭后戚防禦邊寇取回輿銳專命大夏自治又請罷  
取天下畫工仍革臨清鎮守凡三事其治河一事多  
官會議如其言 上以大監總兵官不必取回但令  
裁省禁革而已由是輿銳憤恨圖以報復誣公妖言  
詔差百戶胡節械繫如京山東民沿途遮胡泣訴稱  
冤胡亦泣擁莫可行行將濟河濱河民亦然乃慰諭  
以去及 陛見挺身跪不伏 上益怒繫錦衣獄僉  
謂莫測胡入見司禮諸中貴備言其深得民心且犯  
非其罪語與淚俱諸中貴約與之解南北言官交章

論救 上察其忠謫長沙府同知後河治一如其策

當時 廷議謂三事疏與文懿講學聽政疏實相表

裏而剴切過之所謂有是父必有是子也抵府卽署  
事民適阻饑嘗念寬一分則民受一分之賜故革驛  
傳之包當禁屬邑之餽送却屋稅以支應量地方以  
供祀要以省民已耳醴陵淶江橋通七省自李唐來  
已有七墩正江中架木其上不久卽毀茂元知舟渡  
被溺者衆因爲文勸諭且先蠲俸以倡民樂爲之無  
何所募以千計悉輸之令令以憂去其資則官貸民  
侵橋迄莫構後起守安慶移文湖廣極成之越二載

以疾篤丐歸銓部及撫按諸司皆檄浙省勸駕家居  
五年絕意仕進言官論薦者無慮數十疏十六年起  
陞安慶府知府憑至乃移關本府以繳伍都憲符時  
知府事率僚屬諸生抵廬責以大義不獲已止携二  
僕以行時府多畢方爲災白晝火起軍民苦之乃爲  
文以責城隍患卽弭息歲連旱必齋素徒步懇祈雨  
果大注需屬邑盡霑足乃已動惟儉約然應祀神宇  
則竭力營治他如旌賢坊忠節祠城垣衢路固弗脩  
繕其邠鹽稅遂倡優奏減胡羊價銀及革天下稅課  
司之在州縣者尤有裨於民十七年入 覲大率焉

公久升揚於衆曰若揚某者天下第一知府也十八  
年陞廣西布政司右叅政長沙士民爲之立碑建祠  
以祀云在廣西風采益厲岡卹烟瘴徧所卹而迓恩  
恩田州二府土官岑峻岑猛相傳殺貽患地方正德  
元年 上命三府進兵乃率前哨擒岑峻并黨屬一  
千有奇 詔改二府爲流降岑猛爲福建平海衛千  
戶猛遂擁兵據治勢甚猖獗乃臨其境諭以禍福猛  
言不便遠遷故耳茂元曰是不難卽今魚窩等寨苗  
賊背叛汝能備兵從討以功贖罪吾將 奏請爲爾  
免遷猛卽叩頭願從魚窩等寨者柳慶徭徭也其酋

韋朝宣等亂先是三府具聞其年亦勅令三府  
征剿乃協同將官破魚窩等寨擒斬甚夥事定  
免其遷况材黃文昌兄弟三人爲思明惠巡官討之  
不克二年陳都憲乃委同總兵官相機撫剿文昌聞  
之面縛乞降乃徙文昌而平其黨三年請老不報時  
逆瑾差御史孫迪查盤廣西布政司庫各道皆措銀  
千兩以餽瑾茂元若罔聞同鄉謝迪嘗諷言無千金  
難免桎梏之禍蓋審圖之對曰千金之餽非盜官帑  
則剥民脂以此自救是畏無妄之災而犯有名之律  
諱將益深謂之智可乎故誓死不爲四年夏吏部擬

陞江西右布政使璉僞 旨令致仕乃書寄其子曰  
昔求之而不得今不求而得之喜可知矣卽買舟歸  
五年璉誅起江西左叅政尋陞雲南右布政使未至  
轉左時征剿那代僉餉有方且查校傷者給帑醫埋  
士心感激司庫有餘銀幾百鎰曰無礙錢吏白惟所  
用乃叱之曰此正在法賊也烏得無礙藉以議之其  
大理奇石之類一切不取七年秋復疏謝事不允陞  
貴州巡撫僉都御史奉 勅兼制四川西陽湖廣湖  
北諸道以討草子坪五寨平順烏雞等苗寇俄改南  
京都察院右副都御史既得咨以爲兵糧已集事貴

神速若需交承寇有備矣乃駐扎湖貴中界遣將募  
兵不一月寇悉奔潰是捷尤偉茂元疑平民必有橫  
罹鋒鏑者寢息爲之驚愕且晝夜批答神傷遘疾其  
年冬遣人繳勅始抵貴州治惟以鎮靜安集爲主  
然大監總兵官而下自罔越厥度八年夏接撫沈都  
憲至以疾歸浙奏不容辭其年秋陞南京兵部右  
侍郎久之始赴任九年改刑部右侍郎累辭不許與  
大司寇張公子麟少司寇馮公清同心弼教張盛稱  
其古人風吾輩所不逮十年兵部錄貴州功賜白  
金二十五兩織文紵絲二表裏十一年以疾卒年六



十有七茂元孝友天至能視烈日久不眩生平偶僅  
有磨略見義當爲毅然爲之不自顧少登高第賸靡  
仕人不見色喜中遭僦寒屈下僚略無怨悔且同學  
宏博爲詩文飄逸俊麗有麟洲存稿若干卷尤工書  
法其在長沙於嶽麓書院復構尊經閣極高明亭各  
一考文公年譜凡事繫長沙者分以八題題以策勸  
譜以楷錄親爲之校賈以練書皆手筆也其草書士  
夫家多以爲珍玩張都諫弘謂其字畫遒勁匪特臨  
池之功抑亦正氣隨寓而見也將以爲格論凡往甲  
有喪者之家雖數十里不煩其飲食歲遇祖父母父

母諱展必齋素終日喪祭悉遵家禮成文懿未就之  
志與碧川拓始祖及五世祖墓地樹碑益田以時享  
之從弟二人蚤失怙恃撫愛周至長求分異乃垂泣  
諭以長策不可回以文懿所遺田若干畝與之仍歲  
給俸餘以爲常貴州有吏單興者阡邑人也故窮不  
能還妻子號訴携之抵其家道里之費弗計也其義  
舉懿行類此

刑部侍郎劉公玉傳

縣志

劉玉字咸栗江西萬安人弘治丙辰進士爲輝縣令  
力拯凋弊歲饑請賑不待報發粟已而郡官聞廉民  
恐爲公累爭先歸粟墾田勸耕奏蠲虛稅民復業者  
累千計立教條十八事以興民行召爲御史輝人爲  
立生祠因天變陳六事曰端治本清化原親大臣屬  
庶官擇內侍懷外夷武宗嘉之公復疏劉瑾等八  
黨扇奸宜竄之法而傾命大臣劉健謝遷尙委任疏  
入瑾大怒尋詔逐黨人公遂罷歸復構誣輸粟者  
三凡四百餘石旋逮下詔獄凡四月始免還璽跡

起爲河南督學僉事轉福建副使督學如故教本黜  
浮表揚靖難之節招降山海之寇召爲大理左少卿  
所獄疑獄以卑切引益切應從重論得 命旨著爲  
令已卯改南京僉都御史提督江防聞事藩變傳檄  
致詞以舟師往援安慶及宸濠就擒嘉靖改元 召  
入以平濠功陞右副都御史尋擢刑部侍郎大獄事  
起下 詔獄罷歸卒于家公學一主於誠常味齊戒  
二字謂動靜無間而誠乃可得故終身無浮詞詭術  
孝友信讓疾邪秉公廉潔之操始終不渝所居僅庇  
風雨尤精於天文地理兵律儀章法制皆詳究其本

宋隆慶初

詔贈刑部尚書諡端毅

東瀛王公啟神道碑銘

黃紱

公諱啟字景昭號學古後更東瀛姓王氏世居黃巖  
栢山之橋頭曾祖玩初布衣有隱德祖欽舉進士未  
廷試卒祖妣章氏旌節婦父松妣鄭氏生母黃氏  
初歸時髮麗躍于岸衆以爲詐後乃生公祖父二世  
皆以公貴贈都察院右副都御史章氏鄭氏黃氏皆  
贈淑人公幼而穎異書史過目不忘年十六家貧無  
應門者其父命執遞鋪役公偶失誤時縣令欲人鄭  
公達怒將杖之見其肌膚氣貌不類凡兒疑而問爲  
誰家子公以祖父對又問爾何業公以讀書對鄭公

遂面試乃亟嘆賞令罷役收而教之比三年領成化  
丙午鄉舉登丁未進士時猶未婚告歸娶出授霍丘  
知縣勤政惠民操慎不苟有兄弟爭財訟不息公以  
宋人所著兄弟吟令誦之使朝夕相對立廳事久之  
乃悔讓其所爭而退邑人皆感公益敦教導重農務  
緩催科鋤強梗霍民至今思之於是名譽大起弘治  
間先君居選部薦之 召選南道監察御史盡職敢  
言嘗言 皇親張鶴齡家奴生事及言守備內官輩  
讓不法人皆寢之滿考陞江西按察僉事詰奸滌冤  
既訟者服未訟者畏脩白鹿洞濂溪二書院及文丞

相祠毀東嶽等淫祠四百餘所政暇讀書間有所見  
輒隨手筆記正德丁卯考績上京明年陞本司副使  
擬改山東提學不果先是以他事觸怒劉瑾降廣西  
容縣知縣謝文肅公嘗贈以詩有不挫心藏國士風  
之句瑾又行令廣西巡按御史提問罰米三百石輸  
之官已復有他事罰米二百石久踞梧州待命未  
報會赦免比瑾敗乃復爲四川蓬州知州鎮撫兩  
廣都御史林公廷選以公志節論薦陞南雄府知府  
優任半載丁太淑人憂途間陞貴州左叅政服滿陞  
山西按察使明年陞江西右布政使奏罷寧濠私貢



新茶新笋數事時濠威酸方熾人皆以爲難尋丁父憂服滿陞廣西左布政使以征蠻督餉有功陞俸一級辛巳陞都察院右副都御史巡撫雲南雲南地雜華夷公輯綏有方人賴以安嘉靖甲申陞刑部右侍郎詳愼刑辟丁亥以大獄免官歸未嘗略有怨懟日事田園閉戶著書足跡不至公門所著有正蒙直解周易傳疏周禮疏義大學稽古衍義赤城會通記尊鄉續錄古文類選王氏家譜撫滇翊華錄元鑑年統通言等書公居間凡八年偶因喪子之戚得麻疾疾革猶衣巾坐正寢湛然而逝時嘉靖甲午十一月五

日也公器貌魁偉虬髯星目心地坦夷不矜小節與人語真率無防畛不肯隨俗作好惡低昂以亂賢否是非性好著述然不甚刻意平生飲食衣服粗糲如野人然噫古道日遠世變江河而天下相趨於薄求其能存先進之風蓋鮮矣惟公志不同於俗行不遂於時任其天真而介特以自守處廟堂而不知其榮處山林而若將終身其殆澹然無欲於世者世界可多見耶

通議大夫刑部右侍郎雪臺劉公節神道碑

黃佐

公諱節字介夫初號梅岡更爲雪臺老稱涸虛翁曾  
王父文遠王父原芳父滋司訓合浦奕世皆有令德  
母歐氏賢淑克相其家公生而穎異容止端莊八齡  
隨任習小學適鄉飲廉守臨學見而奇之未幾失怙  
歸鄉向學益力十六充郡庠生弘治辛酉元旦賦詩  
有筆掃萬夫之志督學邵公實得其文歎曰雄才可  
空冀北矧江右乎比鄉試侍御周公進隆素負經學  
得公卷大恩服遂擢第一乙丑會試者在第六及

廷對敷陳剴切遂寘二甲授兵部武選主事時逆瑾竊政偶忤時宰謫尹宿松宿松邑小事劇民悍吏緣爲奸公發摘如神有假威肆整者廉得其實斃之杖下合境肅然勸農興學邑遂大治甫二載晉守廣德邑民立碑以昭去思比蒞州事治如宿松而養老賑荒惠政益著其剖斷精敏囹圄一空癸酉晉四川提學僉事欲疏終養母止之曰汝當成賢圖報勿以我而後君也汝昔赴考貽我慮多矣按歷必母憚遠庶體我心乃往蜀申條約正倫理首明關雎之義婚姻以時精神斐然向風歲試諸生雖僻壤必至遵母

教也少師石齋楊公言諸朝曰吾蜀董學得人矣丁丑詣京考最其疏得 詔馳恩晉雲南兵備副使節戎金騰邊夷畏之己卯復奉 命提學廣西是年當賓興監臨留公提調嚴正錄文比過家猶欲疏辭母命不獲已乃怏怏就道至則施教嗟別如蜀壬午賓興得士錄文亦如蜀癸未考績歸省得報晉福建左叅政會太宜人疾作留侍湯藥竟宅憂哀毀喪葬曲盡禮制比起復補任河南督理糧餉會計惟允丁亥晉浙江右布政使適左帑久病 奉命代之戊子復當賓興時方更化遣朝臣主試公因上疏請增解額

雖不果行公議歸之浙號名藩出納最冗公親閱文籍盡革吏弊己丑冬晉都察院右副都御史巡撫山東時遭荒歉加以蝗蝻水旱盜賊搖起公連疏蠲逋賦通錢法謹婚喪招逆徙禁濫役築河防百兩政務惟先內治乃嚴檄守巡兵憲討王文王世英二年寇悉平之於是勾稽各司巡歷事蹟以驗公勤官皆奉職疆域清謐復疏訪用境內材賢教養孔氏子孫上皆嘉納他如宗室祿米官師俸廩以至軍馬城池獄市驛遞惠民藥局涵澤閘之類羣廢舉舉而張施注措無一不宜者值冬無雪隨時蠲應及春時雨雪

足大有穀麥齊魯之人皆舉手交頌曰公之孚惠惠  
于天人矣庚寅奉勅總督江淮漕運仍兼巡撫卽  
疏漕政五事曰假運轉專責任申考察省查點禁盤  
據遇撫五事曰治水患足食廢寬馬政節重課革冗  
員猶慮綜理未周也復申議政八事巡撫六事次第  
行之嘗奉命祭告祖陵皇陵以祈繼嗣疏請  
建碑亭于基運兩聖二山以崇祖靈答神呪又甄  
舉人才特及泰州布衣王良奉懇請歲華營倉內臣  
由是貂蟬介冑不敢肆而兵民頌美如在東都時  
居無何祀典告成惟恩王父及父俱贈如已官三

年績最進階資治尹廕子音國子生壬辰晉刑部右  
侍郎佐理詳允獄無冤滯大司寇韓公賢雅重之是  
時朝野皆知公忠精可大用然負文名亦見媚於人  
癸巳星變疏乞致仕 詔從其請年五十有八爾公  
歸立義館延塾師以訓族構書院貯羣籍以授徒伯  
兄與蚤世則撫恤其子季弟甫治產則厚遺以贍其  
不足凡創庄居池館散其素積矧及姻黨時或覽名  
勝屬詠自適人樂從之遊乙卯秋住崇義山庄歸而  
疾作雖備沐惠酬如故自知不起遂令人易簀正寢  
謂諸孫曰吾其順命也夫言畢而逝享年八十輯有



廣文選周詩遺軌春秋列傳兩漢七朝文獻聲律發  
蒙並行於世

刑部右侍郎朱公廷聲行實

王希烈

二

公諱廷聲姓朱氏世居進賢登弘治己未進士拜官  
行人以狷介聞武宗時中官劉瑾以勢躡籍中外  
天下側目廷聲乃上疏請誅奸慝以清君側瑾銜之  
矯詔誣逐黨人中以危禍詞未落職勒停十年公  
毅然當之不爲禍休遽墮伏誅公道昭明歲辛未以  
錄用言官疏銓部題公復起扶卽署臚官浙江按察  
司僉事湖廣副使河南左叅政湖廣右布政使福建  
左布政使陞都察院右副都御史巡撫湖廣復陞刑  
部右侍郎公忠勤廉介以次敘遷其食憲兩浙也平

劇賊湯毛九亂將卒向義而成功士畏威而懷德其  
副憲湖省也備兵辰沅而苗夷率服明刑弼教而貴  
校安業勸助邊石肖像生祠任河南救荒善政而民  
不阻饑小灘漕兌而軍民胥利其摧中丞也力贊

顯陵工成屢承 先帝金帛殊 賜會荆襄地方值

歲凶荒百姓饑疫流離載道老幼失所公目擊其艱  
乃嘆曰此莫非 天子百姓可忍使填溝壑乎况此  
等雖值天時之變實皆爲吾民父母者之責也遂疏  
出內帑數萬全所活不可勝計既又奏收贖律鈔官  
司無得侵濫俱貯以備賑荒迄今守爲定典及厚刑

侍公主之以忠誠佐之以明允時無冤民直已抗節  
耻屈權貴會有風雷孽宇天變例有陳言公遂抗疏  
乞休雖蒙 溫旨慰留公曰吾爲國重臣不能上消  
天變可尸位乎歸志益決力以疾辭 聖諭云朱廷  
聲旣稱患病准回籍調理痊可之日有司奏來起用  
後以催取風憲官員事例奏 請起用公力辭以疾  
至嘉靖丁酉八月二十四日竟以疾終

刑部侍郎陳璋傳

雷禮

陳璋字宗獻別號省齋浙江溫州樂清人資性聰穎  
書傳過目終身不忘年十八爲庠生二十當大比小  
試爲首乃言曰古人厚積薄發吾積之未能何發之  
望遂不入試而返長老咸異之以爲遠大器越歲丁  
父憂哀毀不踰禮事母淑人孝養彌篤弘治乙卯領  
鄉薦乙丑登進士疏歸欲終養淑人諫之曰不聞舍  
孝子而爲忠臣者乎吾得汝謀養足矣促北上以正  
德戊辰抵京值逆瑾竊政獲罪焉遂矯命令致仕太  
宰許襄毅公宣於朝曰古今曾有以進士致仕者乎

欲爲周旋而力不可同事者咸強賄之璋曰官以賄成吾不爲也卽怡然就道及家甫二旬而母告終議者以天所以成孝子也瑾誅應詔起用辛未授刑部主事時司寇藁城張公子麟精法律屬多難之璋曰士而不讀書謂之廢學官而不讀律謂之曠官況生死人乎乃研求法意至忘寢食律有疑難親爲註解遂以法家名歷員外郎中丙子審錄天下獄囚司寇張公廉其能疏名以上因奉勅審錄八閩所活不下百餘人有恤刑錄行于世錄囚故事鎮巡皆致幣以爲常一無所取曰吾曾大父積勲公使朝鮮兄交

際饋遺例不受吾恩無忝先風非矯也事竣還京適  
毅皇帝欲南巡偕郎中陸君倬等諫止觸 帝怒甚  
罰跪門五日杖五十先是璋病痢人皆懼而止之璋  
曰食其食者死其事吾何以全身爲奮然往陳旣杖  
出臀無完膚伏枕閱五月而後起張文忠公孚敬時  
方釋褐禮部亟往賀曰死生不貳先生有焉辛巳陞  
雲南按察司副使 世廟嗣登寶位給事吳公巖許  
公復禮議褒忠良以名上可其奏加俸一級雲南去  
京師萬里隣接吐蕃諸夷種類不一多有不能盡法  
者人或難之宗伯王文定公瓚獨曰爲政不難先生

素不以勢撓不以利疚嚴毅端方而出之以和平恕  
慈祥而斷之以義於臬司奚有及至果寬嚴相濟用  
得其情然介獨自立當路憾之乃曰官以行志屈志  
以伸官是愛官不愛身也吾有去而已卽稱疾不出  
當路知不可屈強出之旣乃據其美而旌之于上  
時有武弁以非其罪繫獄鞫者咸寃之而避嫌不肯  
決及署臬毅然曰吾知所矜者情也所守者法也何  
嫌之有卽出之乙酉陞行太僕卿頗行武弁令其子  
馳數百里外餽以天花菜二盤捧手之覺其中皆金  
寶也麾而還之僉事傳君尚文貽書稱頌滇中至今



以爲美談太僕馬政廢弛則條陳五事一求實用二  
懲不職三嚴有司四儆守臣五崇寺權咸獲俞允一  
時馬政聿有成績丁亥陞大理寺左少卿都御史熊  
公浹薦之于朝戊子陞本寺卿凡法司庶獄及天下  
重囚悉從處當以報而平反日衆時錦衣捕獲羣盜  
數十人奏送法司定罪中有十二人實平民也司寇  
胡公世寧知其寃送大理審瑋曰咎一臧獲于庭不  
當其罪人且得而議之况置十二人于非命乎獄雖  
成可得不辯乃駁回胡公喜曰此先得我心者也遂  
爲開釋瑋曰昔有成命宜再請具奏釋之一日與胡

公議罪不合各奏請下 廷議竟是率言且行中外  
法司以爲成式未幾胡致政語人曰陳公知法而能  
恕司寇非此人不可胡剛氣人也與公若不合而卒  
敬服之如是已丑以疾乞歸不數月法司以決獄忤  
上意相繼罷去祭酒魏公校嘗曰世道相交大抵以  
貌而省齋獨真法家相承率主於刻而省齋獨恕宜  
天之昌其後也壬辰 上詔部院議用舊臣乃以瑄  
與尚書泰公金王公中侍郎李公廷相應 命癸巳  
起爲刑部左侍郎時司寇聶公賢虛心以受事無大  
小必咨而後行且日以律法與諸屬講明故一時諸

屬多以刑名著聞張公仍撰其舊稿壽諸梓名曰比  
部招議凡入仕者咸用以資吏治甲午南京 太廟  
災 上聞變震怒欲罪諸中使及內外守臣特 勅  
璋偕錦衣給事往勘陛辭 賜酒饌相國李公時執  
手曰此 朝廷重事君盍慎諸及至多方咨訪直以  
天變奏時 上意不可測人皆危之乃嘆曰知有公  
耳既而有官校經過訛言爲公事至乃笑曰事在勿  
欺禍福非所計也乃 上竟可其奏中使守臣悉從  
末減還朝踰月寢疾懇疏乞休不允乃強蒞事有上  
官以非法杖歿下吏聞下法司獄或欲貸之乃與革

公曰殺人抵罪官與民一也固執不可用忤執政意  
偕壽公致仕而歸士大夫咸惜之賦詩贈者甚衆司  
徒梁公材有曰直氣每聞持正論明刑真欲爲求生  
大臣匡濟關天下不爲身謀有重輕尤爲人所傳誦  
云爲人剛毅是非無所隱有不直者輒質之衆中而  
人竟不怨自處清介與俗革寡諾未嘗一呈身要路  
其爲刑官持廉秉公固不深文巧抵以入於煩苛亦  
不徼福于惠以流於姑息親舊患難力可援者必爲  
盡心弟璿貧而早亡撫其二孤給田分宅俾各有成  
立尤耐苦節歷官自常祿之外分毫無取常曰未有

不儉於家而能廉於官者布衣糲飯終其身不改居  
室湫隘晏如也每念宗祠未建考妣廬所棲託過時  
享輒淚下曰吾何以安飽爲遂竭力經營之規制則  
斟酌古今爲久遠計闕家有法雖頑慢亦知以禮自  
度子姓有讀書向進者卽喜而不寐從弟侍御君暨  
少聰慧教且愛之曰亢吾宗者必此弟也遂使與子  
猷隨京師受學凡自公退食卽以經史相問難至夜  
分不倦故卒同領鄉薦及仁御君出仕以官常道趙  
之至于猷屢不第愁而諭之曰汝但讀書制行無愧  
古人不使先鋒隕墜足矣固不以功名爲汝苦也自

家食以來足跡不入城市惟杜門種花以詩酒與司  
寇高公友璣往還及親故相娛樂壽七十有二

刑部右侍郎乙峰蘇公民行狀 陸深

公諱民字天秀別號乙峰先世爲浙之遂昌人洪武  
初我太祖大封親王博選東南巨族以充侍衛公  
曾大父良與焉時從愍王之國遂爲秦人籍儀衛  
司良生仁貴仁貴生鄂南公文通配趙氏實生公嘉  
靖初年公以滿一考例得推恩由是蘇氏之入秦者  
自仁貴文通皆贈通議大夫南京兵部右侍郎而趙  
爲太淑人公自幼穎悟不凡稍長卽通文義游鄉校  
師事宿儒柳先生會選菴楊公爲憲則督學校諸弟  
子員公名在柳先生上當康食公怡然讓之白於楊

公公曰讓美事也知讓必知孝與忠矣亟稱之時鄉士大夫皆曰蘇氏子賢能讓自是刻志向學舉弘治乙卯鄉薦累試禮部登乙丑進士第初授山西榆次知縣榆次健訟且善誦人難之公無懼色下車公以蒞事廉以律已於是訟息而誦聲聞隣縣有訟於撫按者不之他而願之公取決焉賢聲藉藉徵爲兵部職方司主事時逆瑾擅權構公落職爲四川潼梓驛丞公毅然就道在任盡職無悔時蠻夷叛撫按季公進剿公承委養功甚多撫按曰爾功也公辭不敢當亡何瑾誅復官爲工部主事管理山東徂徠等處泉源



改吏部考功司主事陞驗封司員外郎調考功文選  
兩司陞驗封司署郎中爲諫止巡遊事奪俸六月再  
調考功司署郎中時奉例凡諫止巡遊官跪廷受杖  
者得陞俸一級乃調文選司郎中文選據要地多所  
嫌疑公處之特有清譽乃陞太常寺少卿以祭掃例  
請 上俞之畢事復任陞南京太僕寺卿馬政修舉  
召改光祿寺卿樽節財費歲以萬計陞太常寺卿提  
督四夷館尋陞工部右侍郎丁趙太宜人憂家居數  
載清修自持一毫不以干人服闋日改南京兵部右  
侍郎督署工部事八月餘司屬以直贖百金奉公公

辭曰我自有應得者此何以爲南都人士服其廉且  
當也滿一考例當給由道經榆次榆坎公舊治縣也  
父老百姓至萬人要迎入縣則又挽留遮道不欲行  
甫入京適刑部右侍郎闕吏部既名上 上卽用之  
以南京工部修理 孝陵功 賞白金二十兩織金  
紵絲二表裏甫兩月卽得脾瀉疾怡然而逝得壽六  
十有三云深與公爲進士同年雅相知愛公方請蜀  
時嘗從總制林公見素先生平蘆 人果昨入蜀道  
經江津蘆戎之間見孤城敗堞水聲嗚嗚然正公効  
力出奇之所土人猶能歷歷道公姓名深心甚偉之

丁酉召還公適捧表入 謁獲與公握手談往事終  
續不能休戊戌之夏公內轉過從尤數而詎意遽止  
於斯也悲夫

刑部右侍郎王公浚墓誌銘

章拯

嘉靖乙巳六月二十五日刑部右侍郎王公卒于家  
公諱浚字德深玉泉其號服之建德人系出太原曾  
大夫瘠以歲貢投宿州衛經歷大父金盛以公貴俱  
贈右副都御史妣俱贈淑人公少有大志卓然不羣  
同邑張大尹見而奇之許妻以女携歸授業焉弘治  
戊午以春秋舉于鄉戊辰擢進士出身授荊州知州  
愷悌宜民時逆瑾擅政中貴有占民產爲牧地者爭  
之不得乃鳴於朝逮繫錦衣獄瑾誅乃釋丁丑以內  
艱服闋陞刑部江西司員外郎武廟南巡拉諸寮

疏諫被杖幾斃罰俸半年庚辰出爲山東按察司會  
事兵備沂州清慎而政肅嘉靖乙酉進貴州威清兵  
備副使有土夷吳尚賢偶得宋印持以爭官構亂公  
設方略擒之不費兵餉而地方以寧撫按上其事特  
蒙恩賚又土舍安萬銓未授宣慰頗驕蹇不奉召公  
以誠信撫之適寧國土夷恃險作亂久不能平衆謂  
非安氏兵不可破公移檄召之卽馳赴剿平之實公  
之忠信感之也戊子陞四川右叅政未行銓曹以貴  
陽軍旅方棘遂進公按察使巡撫葉中丞嘗舉以自  
代不果用庚寅轉河南左布政使辛卯擢尹順天謂

所親曰吾昔守薊地衝而民貧役不能堪霸饒而僻  
民力甚紆吾今得均之矣蒞任未幾遂均二州之役  
爲霸人所中又以直道與懷治者不協劾其違例更  
役乃左遷福建右叅政歷右布政擢右副都御史提  
督南贛等處軍務公奉宣德意以誠信爲撫申以威  
嚴咸戴其恩華心向化數年之間師旅不興帑儲大  
省南安守欲求規薦密置數百金於米囊以獻公覺  
而叱去之聞者悚然己亥進南京刑部右侍郎尋改  
刑部未幾 九廟災遂懇乞致仕嘗曰人生貴知足  
爵位原非己物見得透則無往而不自得矣公素性

勤儉非疾病未嘗不雞鳴而起暇則手不釋卷其服用淡如也凡祖業所遺悉推讓諸姪曰祖宗積德而發於吾幸有祿位又可與汝輩析其私耶凡親故所請卽力爲維持不責其報尤樂道人善極口稱詡過亦不能容然不藏怒焉故數歷中外餘三十年所至無事烜赫而去後之思恒不能已則其故可知矣詎非篤行君子哉

刑部右侍郎迂湖葉公相墓誌銘

公姓葉氏諱相字良臣號迂湖其先自會稽徙揚遂  
爲江都人祖永年父淵俱光祿署正祖母丁氏前母  
趙氏葛氏公其仲子也幼穎不喜弄讀書過目不忘  
弱冠補郡學弟子治詩經年二十一領弘治乙卯應  
天鄉薦明年居父憂喪葬祭盡禮壬戌舉進士授浙  
江金華府推官平獄均賦民咸德之當道疏其賢擢  
刑科給事中屢遷至禮科都給事中時逆瑾方熾人  
情洶洶公封駁論建行其所欲不憂利害瑾亦竟不  
能中傷之至於建儲一疏尤剴切知大體而當路者



忌之十二年出爲湖廣參政公亦欣然往至則敷仁  
宣化興利剔蠹百姓愛之如父母嘉靖元年以母憂  
歸哀痛幾絕襄事一準家禮四年補貴州左叅政無  
何陞江西右布政使尋轉左使江省稱劇公每侵晨  
蒞政吏抱文書立庭下以次覽決竟日不少休撫按  
廉其治狀交薦之七年陞都察院右副都御史巡撫  
貴州兼理軍務江省民無老少遮道泣送之貴州民  
知其來咸舉手加額曰吾父母至矣其得人心如此  
時貴有芒布之亂公以計殲其魁而撫之事聞 天  
子賜鎡幣九年陞南京工部右侍郎三載考績贈祖

父如其官祖母前母母俱贈淑人子曉廢官生尋轉  
戶部左侍郎加憲職奉勅賑陝西暑行遂病瘧痢  
病得旨允調理家居十年少瘥則與鄉士大夫之  
賢者爲耆英會其於世處澹如也撫按屢薦其才可  
大用而天子稔知其賢二十年復起爲南京工部  
左侍郎尋陞刑部左侍郎時大獄盈庭公方署卿篆  
秉公竭力咸得無寃二十二年以病乞年溫旨慰  
留明年以引例辭吏部覆疏謂公以端重之度廉介  
之操入仕四十餘年始終無議歷官一十三任中外  
有聲未可以求退等語聖意亦養法不棄至懇乞

乃得請公歸若干年而卒年七十一訃聞 天子悼  
之賜祭葬如例公爲人寡言笑慎交游天性孝友待  
族有恩禮嘗捐俸數百兩置田數百畝以贍伯叔之  
遺孤俾守塋域供祭祀生爲家娶死爲殯歛無失所  
者弟婦蕭孀居公爲贍之曰無使婆也匱足不至公  
府有司咨詢必盡忠告東洲崔公之評曰公以學術  
經世以行誼表俗以正直立朝以明哲保身此其章  
章明者信哉其言之也

通議大夫刑部左侍郎燕峰唐公潛墓誌銘

趙鏜

公諱潛字汝約別號燕峰玉山人也唐在宋多聞人  
國朝寒泉公軾登正德辛未進士官行人未幾癸酉  
公卽舉于鄉繼登丁丑進士官比部一門簪笏並列  
公之在比部也剛正執法人不可干以私有張姓者  
盜官給鈔公捕之急令妻以金珠首飾詐稱鬻者投  
胡淑人所而亡淑人遽以白公公按治之張伏辜京  
師肅然陞四川司郎中時九廟大工興積年攬戶  
侵漁萬計事發汚峨勲舊大臣主者不敢議司寇公

改委公公成獄重罪首惡而被汚者得白論者以爲  
得體先是正德末年公嘗諫止  武皇南巡  廷杖  
幾死至嘉靖三年復抗疏大禮再被杖每陰兩磨輒  
痛楚曰吾得見寒泉公地下足矣蓋寒泉以諫死故  
也已聞乃翁石泉公遭疾三上疏求歸不允最後一  
疏詞甚切  命未下而行憾者欲以考察去公得見  
素林公言而免陞湖廣憲副吏民曰是嘗以死諫者  
相戒莫敢犯及叅廣藩舉問益振連有海寇當事者  
偶失利公募兵盡勦之會右轄當入  覲以外艱去  
次當及公甫五日卽離任鍾石費公稱其垂橐而入

真不誣云未幾陞總憲益恃風裁涓塵霍公深重之  
轉閩右轄未行轉浙左凡出納悉屬之條案無一毫  
染指至假貸他人弗卹也拜都察院副都御史巡撫  
鄖陽未及蒞任中言者歸歸惟圖書四壁淡如也及  
再起視河道則曰利不當與水爭智不當與水鬪汲  
汲惟枝河是開長堤是防其見于一政體明職守重  
運道諸疏可考也偶盜起曹單勢甚猖獗公擊河夫  
與之格鬪比當事者至則先已撲滅矣其事不避難  
類如此陞刑部右侍郎尋轉左復因言致仕歸歸四  
年而卒年六十五公性坦夷而耿介事祖考盡孝蒞

葬祭盡誠訓子弟以孝弟節儉自奉甚薄而明恤宗族則恒若弗逮歷官俸餘悉以刊譜又倡率一族以建宗祠立祭田講祭禮皆炳然可爲世法所著有比部集浙東集振美堂集泊河奏議致政錄而平生精力則專在家譜一書云

刑部右侍郎鄭大同傳

柯維騏

鄭大同字皆吾嘉靖己丑進士初授行人司行人轉  
吏科給事中累陞都給事大同之人給舍也論事持  
大體如糾權奸薦耆舊諸封章以忠亮扶元氣方是  
時分宜相嚴嵩持要銜清秩奔走天下士而大同之  
私舍在長安西衢與相第聯通通於直左掖歸卽捷  
關非有 詔下內閣與諸科博議未嘗私命騎一入  
其慎行如此丁未分校禮闈北地楊忠愍繼盛其所  
得士也已而陟南通政司通政歷太僕卿太常大理  
留滯周南更七八年不內召會太宰李默起家柄用



乃引之北無何卽以大理卿轉刑部右侍郎後李爲相高門客趙文華誣奏坐怨誹下詔獄屬刑部案當李罪大同謂李發策用事註誤無訕上意當李除籍而相高密遣人恫喝諸曹郎謂天子切讓李罪應不寬慎勿輕附李遂不可救而大同遂目爲李黨歸矣大同爲經生時受業于儒先吳祿者大同歸而吳尚無恙迺持弟子役儼如諸生時嘉靖辛酉冬倭囚屯四郊吳北郊人歿于賊大同謹治衾衾以士禮往歛走二監購官兵傳之入壘遂爲位哭諸寢者累日仍爲藁葬郊外云嘉靖丙寅以疾卒卒之旦會新復

文廟有江西木匠數人於昧爽候見大同服大紅拜  
廟門內出廣橋忽不見頃之一匠過其巷聞哭聲歸  
相訝曰早有長髯偉貌行昂昂如鶴衣吉服肅入廟  
門內拜者非侍郎乎蓋大同宅近官牆每過必入謁  
故其卒也亦脩禮而行如此從弟綱同登進士第由  
郎署出守雁湖泉至都御史總制兩廣數歷中外具  
有才猷一時鴈行並列亞卿里人榮之世系則故興  
化縣忠惠僑公後

通議大夫刑部左侍郎東橋楊公大章墓誌銘

呂本

先生諱大章字章之東橋其別號也惟楊氏之先出  
關西宋有正一提舉者尅馬南渡依親錢某爲餘姚  
令卜居於江南學官之東遂世爲餘姚人高祖自莘  
配黃氏曾祖宜振贈工部主事配黃氏贈安人祖榮  
日讀書盈寸以奇才著稱於時登成化壬辰進士第  
官至工部郎中配潘氏封安人父策以公貴贈刑部  
主事妣史氏先生生而穎異書一過目輒誦年十三  
應省試旣而科舉每試必在高等順徘徊庠序間逾

十載先生益務記覽深造詣汎濫停畜無涯浹上下  
數十年事以至國朝典故莫不貫穿於胸中聲名籍  
甚一時文人學士皆自以爲弗若也正德己卯舉于  
鄉嘉靖癸未第進士授湖廣瀏陽縣知縣瀏陽號難  
治乃往令率襲舊仍陋度歲月逋稅逾鉅萬且狡猾  
健訟不可窮詰先生至則持廉秉公根究弊端務  
迎刃而解或出片紙發奸擿伏如神豪民李鑒者籍  
貲犯禁無忌肆毒隣境甚至拒兵殺官以叛先生一  
旦出其不意單騎卽其巢擒之以故強梗豪俠之徒  
皆縮頸改步相戒不敢犯瀏陽號大治撫按交章薦

之適丁封君憂歸服除補直隸欽縣知縣先生因俗  
爲政寬猛相濟禮法兼行教李悌尚廉節興學校勸  
農桑剔蠹修廢而百里之間熙然安先生之化歛亦  
大治於是 天子詔徵治行卓異者若干人而先生  
已擬臺選時冢宰汪公欲降邑人謂先生未嘗通候  
問銜之改刑部主事公論殊不服先生曰吾方憂職  
之不稱豈以刑部爲少耶未幾雲中兵亂廷議選部  
僚有才望者副給舍往先生乃改兵部職方司主事  
召募兵勇布置悉當要害人皆解之還部又督營兵  
趨太廟工畢竣批工部營繕司員外郎旋丁吏太安

人憂除補兵部武庫司員外郎擢武選司郎中銓事  
吏多緣爲姦先生嚴具條格抑絕徼倖吏惟坐聽行  
文書而已而與奪遲速一出於獨裁天下武職待選  
者以得遇爲幸擢山東按察司副使兵備霸州霸州  
固盜賊區連值歲歉人情洶洶不愛死先生多方救  
濟又日練精兵彈壓之惠溥威振數百里之內始帖  
然無憂亡命胡廷秀直入郡城白晝劫殺人從西直  
門出人莫敢近先生選驍騎一二察其向往追至臨  
清縛來斬之不啻如几上市夫鑒與秀可謂梟雄不  
在劉七下乃不煩一兵斗粟坐銷大患其作用神妙

至此先生又巡視大城永清等處城圯武清涿縣地  
廣居民無城可依議及時興工修繕以寓救荒之意  
不數月而工成不惟土著者恃以無恐流離就食之  
衆全軀保妻子者不止數千人頌聲載道延按楊公  
薦之云捕入都之劇盜安荒歉之流民信哉當宁將  
有殊推忽武選帖黃事先後註誤者若干人先生例  
在左遷乃爲江西布政司經歷尋擢袁州府同知未  
幾擢福建僉事參議湖廣荊州兵備副使荊州湖南  
要衝商民雜處尚氣爭利訟無虛日遼藩又多不檢  
每微服薄遊沙上先生曰威克厥愛允濟吾惟鋤其

強橫而善良自安使門禁不嚴而出入不稽有司之  
罪 祖訓昭然王何恃而不悛是以終先生之任而  
荆人奉法不敢玩王亦斂惟先生之言是懼時藩臬  
中先生資望獨深轉本省叅政晉南京鴻臚寺卿又  
擢光祿寺卿工部右侍郎刑部左侍郎皆不次也先  
生在刑部而鄭公曉爲尚書素敬先生凡獄情重大  
者無不咨議先生亦爲之盡必當而後已當是時天  
下無冤民夫何歲己未四月間感疾予告歸本每侍  
先生聞朝有善政未嘗不躍然喜及時事少不當意  
則仰屋太息不已則其志可知也先生平生孝事父



母雖在屢空而志意口體無不適過忌辰節且子姪  
羣衆談及先事欷歔不自勝待庶弟大韶大夏友愛  
甚篤周氏妹寡居子幼顧念無所不至訓子孫循禮  
嗜學守朴戒奢此皆彰彰在人耳目者也先生歷官  
幾四十年而清約不異寒素惟山林引興日與少司  
空龔公輝大叅贊公見陳公禮部運郎公寅武守朱  
公同慕鴈詠談笑不輟嘉言善行無一不爲後進所  
誦法於乎先生用則功在天下不用則善及一鄉卽  
正位六卿享年百歲猶以爲未足乃若是已耶傷哉  
卒以隆慶二年十月距生弘治辛亥八月享年七十

有八

刑部右侍郎楓潭萬公虞愷墓志銘

王錫爵

故司寇楓潭萬公有子曰學憲君學憲君與予同年  
舉進士而余因得以通家子謁公於邸當是時第見  
公被服雅素儀止樸謹相與退而憮然輒有先進之  
思已數叩學憲君所習于趨庭上下者則益歎公玉  
表黃中不名一德而世不能盡用亦不能盡知以爲  
恨嗟乎公今旣往矣其用而不盡用者留之於其子  
若孫俎豆之于民與社則已矣惟是蓋棺垂十年禮  
官僅得以故事爲請三品祭葬而公之姆行修能日

亡日遠弭筆載記之史徵之大同白簡寧復有捐日  
長夜於洞中識伯夷者哉而乃今得鄧定宇少宰氏  
余嘗目少宰人中朗朗掇皮皆眞其咳唾一出必傳  
傳則自今所爲公狀而公與學憲君必欲余一言勒  
石涉江二千里介少宰書以請其勤且鄭重如此因  
不得辭蓋公之先在宋建炎中有處士某者自新建  
徙南昌之東溪五世以前始可譜公之祖某父某母  
傅氏始以公貴得三品贈封公諱虞愷字懋卿楓潭  
其號以嘉靖辛卯舉江西鄉試戊戌成進士授無錫  
知縣政成召入爲南京兵科給事中累遷山東叅議

福建副使貴州糧儲叅政湖廣按察司副使福建右  
布政丁憂復補山東尋改山西左布政使擢南京都  
察院右僉都御史提督操江進右副都御史總督糧  
儲尋以南京刑部侍郎改北致仕歸後若干年爲萬  
曆二十六年六月十七日卒于家距其生正德乙丑三月  
十三日蓋享年八十四矣公幼專敏爲諸生酷貧帶  
經而鋤時從里閭長者講學白鹿洞中歐文莊公一  
見奇之問君子無人不自得所得何事公應聲曰自  
得又何事也人以覘公終身學術事業若懸契云始  
仕無錫錫故多富人善行財上下漏賦籍爲奸吏苦

其窟淺深不能問則往往寄耳目于怨家鄙使者行  
縣輒以風刺取他事一入不得出公曰是皆不平夫  
富人貧人母也緩則使貧人代輸役急則四面設置  
投餉而入之鳴鳩七子誰爲厚薄父母之謂何矣會  
月朔晨朝三老出不意問大姓主名具得隱占狀乃  
手自畫丁糧十徵冊令富人各以差次受繇無得脫  
者至其陰細過不輒發發卽不惜爲上官前破嫌疏  
理時亦以此得忤而公侃侃自若也有簿某實廉坐  
蜚語當去公慷慨率吏民爭之不能得乃解其印綬  
置直指廷中拜且辭曰公卽不聽令令請行矣直指

初怒卒斂容謝公簿亦竟全在南科數與守備內臣  
露章爭事謂營兵不當充私役又謂操江都御史每  
歲操故當與守備叅伍列坐而武皇朝爲權璫所  
抑宜如故便又奏革宜成以後冒功陞襲若干人而  
貴倖側目矣會公復疏救失事憲臣忤旨然僅奪  
俸猶幸肅皇仁聖不輕以言罪人云比補外所至  
有聲績其大者救荒山東西能以便宜發倉粟及贖  
贖貸民而山西饑甚公拮据賑外具爲貧宗叙支均  
祿法功尤著焉御史有清軍福建者試問公軍何以  
清公曰夫明旨固曰清軍不得益軍今一切汰去遠

年耗伍嚴實上聞而軍清矣御史遂以其事委公咄  
嗟而辦公又謂政先大體而上官近喜用巧文新進  
吏日騷獄市民且重足以是御史行部公輒請自往  
代爲讞決嘗一日而出福州久繫囚五十餘人湖廣  
六十人乃其遇法必行如案致貴戚之死奪楚遼二  
藩所侵地歸民雖百口居間不能撓也在山西有無  
賴宗人自號四天王者聚徒謀爲亂部署定矣公一  
日方坐有旋風觸楹忽心動曰是何祥也境內得無  
有變試使人踪跡則亂者已縋城夜遁竟追殺之散  
其黨於是朝議以公有文武材旣再入南京典兵食



則是時海上新中倭振武營新變公承其後日與大  
司馬襄毅李公謀水軍非額設冗食者汰之營軍自  
倡亂已誅外餘皆得公處給糧餼拊摩痛疾而安公  
又以京商困和買奏復故條又上督儲便宜六事于  
是南京輓輸日至軍民相與立碑中和橋頌公之德  
焉時公已入仕二十餘年歷官皆遠徼而最後始以  
積薪久次由南刑部改北其冷吹踈步特立寡援幾  
爲笑于天下然分宜之收也其黨有同里而別籍在  
室而操戈者公獨持平語於向背反覆間或曰嚴世  
蕃且叛公曰世蕃不叛第其穢墨亂政自直一死不

足更引他法以坐也嗟乎使臯陶奏當有易斯言者  
乎而言官會有所受遂深文擊去公矣夫公不幸生  
嚴氏鄉炎火炳蓬勢自不分菌桂顧其生平一介之  
守垂橐而出垂橐而入此亦豈夜行鬼瞰日星視指  
所不及者令併此汙公而公又長者默默受汙以去  
痛乎鄧少宰之訟公寃也蓋儒者當恩怨得失之交  
真器乃見而近乃有逐臣棄友一不快于公論則誅  
語惡聲狼籍私史以公之處謗觀焉而古今人情世  
道可槩見已公爲人敢言似直寡怨似厚不雕似樸  
忘機似通守謙似柔能斷似勇而一以學問融之門

生子弟每見公終日靜翳小樓一榻中間而問起居  
上食公不時答答則語不及他占寒燠枝晴陰而已  
晚年讀圓覺金剛諸經有悟謂此卽我儒無聲無臭  
註疏然不輕爲新學道聽者言獨父子自爲師友而  
學憲君未老倦遊日侍公左右爲最得公斲輪言外  
之旨故世稱豫章之學其灼然著盛者無慮數家而  
萬氏特以挫鋒含茂無標號于天下參于遊道見謂  
不廣然政此公所謂自待也夫自得則又何得哉知  
不知勿論矣

[illegible]